

Na osnovu člana 51 stav 2 Zakona o bezbjednosti hrane ("Službeni list CG", broj 59/26), Vlada Crne Gore, na sjednici od 9. jula 2026. godine, donijela je

Uredbu o prehrambenim aditivima*

Uredba je objavljena u "Službenom listu CG", br. 112/2026 od 31.7.2026. godine, a stupila je na snagu 8.8.2026.

*U ovu uredbu prenijeta je Regulativa (EK) br. 1333/2008 Evropske Komisije od 16. decembra 2008. o prehrambenim aditivima, sa izmjenama: 32010R0238; 32011R1129; 32013R1152; 32011R1130; 32011R1131; 32012R0232; 32012R0380; 32012R0470; 32012R0471; 32012R0472; 32012R0570; 32012R0583; 32012R0675; 32012R1049; 32012R1057; 32012R1147; 32012R1148; 32012R1149; 32012R1166; 32013R0025; 32013R0244; 32013R0256; 32013R0438; 32013R0509; 32013R0510; 32013R0723; 32013R0738; 32013R0739; 32013R0816; 32013R0817; 32013R0818; 32013R0913; 32013R1068; 32013R1069; 32013R1274; 32014R0059; 32014R0264; 32014R0298; 32014R0497; 32014R0505; 32014R0506; 32014R0601; 32014R0685; 32014R0923; 32014R0957; 32014R0969; 32014R1084; 32014R1092; 32014R1093; 32015R0537; 32015R0538; 32015R0639; 32015R0647; 32015R0649; 32015R1362; 32015R1378; 32015R1739; 32015R1832; 32016R0056; 32016R0263; 32016R0324; 32016R0441; 32016R0479; 32016R0683; 32017R0335; 32017R0839; 32017R0871; 32017R0874; 32017R1270; 32017R1271; 32017R1399; 32018R0074; 32018R0097; 32018R0098; 32018R0627; 32018R0677; 32018R0682; 32018R1461; 32018R1472; 32018R1481; 32018R1497; 32019R0800; 32019R0801; 32019R0891; 32019R1676; 32020R0268; 32020R0279; 32020R0351; 32020R0355; 32020R0356; 32020R0771; 32020R1419; 32020R1819; 32021R1156; 32021R1175; 32022R0063; 32022R0141; 32022R1023; 32022R1037; 32022R1038; 32022R1923; 32023R0440; 32023R0447; 32023R1329; 32023R1774; 32023R2086; 32023R2379; 32023R2108; 32024R0346; 32024R0374; 32024R0843; 32024R1081; 32024R1451; 32024R2597; 32024R2608; 32025R0651; 32025R0652; 32025R1150; 32025R1337; 32025R2058; 32025R2060; 32025R2084

Predmet

Član 1

Ovom uredbom propisuju se zahtjevi za prehrambene aditive.

Cilj

Član 2

(1) Cilj ove uredbe je obezbjeđivanje efikasnog funkcionisanja unutrašnjeg tržišta uz istovremeno obezbjeđivanje visokog nivoa zaštite zdravlja ljudi i visokog nivoa zaštite potrošača, uključujući zaštitu interesa potrošača i poštene prakse u trgovini hranom i zaštite životne sredine, po potrebi.

(2) Radi ostvarivanja cilja iz stava 1 ovog člana, ovom uredbom uređuju se uslovi upotrebe prehrambenih aditiva u hrani, uključujući njihovu upotrebu u prehrambenim aditivima i prehrambenim enzimima u skladu sa propisom kojim se uređuju prehrambeni enzimi i prehrambenih aroma u skladu sa posebnim propisom o prehrambenim aromama i određenim prehrambenim sastojcima hrane sa osobinama aroma za upotrebu u i na hrani.

(3) Ovom uredbom se bliže uređuju i zahtjevi za označavanje prehrambenih aditiva koji se stavljaju na tržište kao takvi.

Primjena

Član 3

Ova uredba primjenjuje se na prehrambene aditive, osim ako je posebnim propisom kojim se uređuje njihova upotreba u određenoj hrani ili za određene namjene drugačije propisano.

Izuzeće od primjene

Član 4

(1) Ova uredba ne primjenjuje se na prehrambene enzime utvrđene propisom kojim se uređuju vrste prehrambenih enzima koji se mogu koristiti u hrani.

(2) Ova uredba ne primjenjuje se na sljedeće supstance, osim ako se koriste kao prehrambeni aditivi:

- 1) pomoćna sredstva u preradi;
- 2) supstance koje se koriste za zaštitu biljaka i biljnih proizvoda u skladu sa posebnim propisima o zdravstvenoj zaštiti bilja;
- 3) supstance koje se dodaju hrani kao hranljive materije;
- 4) supstance koje se koriste za tretman vode za ljudsku potrošnju, u skladu sa zakonom kojim se propisuju parametri

zdravstvene ispravnosti vode za ljudsku upotrebu;

5) arome koje spadaju u područje primjene posebnog propisa o aromama i određenim sastojcima hrane sa aromatičnim svojstvima za upotrebu u i na hrani.

Značenje izraza

Član 5

Izrazi upotrijebljeni u ovoj uredbi imaju sledeća značenja:

1) **prehrambeni aditiv** je svaka supstanca koja se sama po sebi ne konzumira kao hrana i koja se uobičajeno ne koristi kao karakterističan sastojak hrane, bez obzira na to da li ima hranljivu vrijednost, a čije namjerno dodavanje u hrani u tehnološke svrhe tokom proizvodnje, prerade, pripreme, obrade, pakovanja, transporta ili skladištenja takve hrane dovodi ili se može očekivati da dovede do toga da ona ili njeni nusproizvodi postanu direktno ili indirektno sastavni dio te hrane, a izrazi koji se ne smatraju prehrambenim aditivima:

- a) monosaharidi, disaharidi ili oligosaharidi i hrana koja ih sadrži i koristi se zbog svojih zaslađivačkih svojstava;
- b) hrana, bilo sušena ili u koncentrisanom obliku, uključujući arome ugrađene tokom proizvodnje složene hrane, zbog svojih aromatičnih, ukusnih ili nutritivnih svojstava, zajedno sa sekundarnim efektom bojenja;
- c) supstance koje se koriste u materijalima za oblaganje ili premazivanje, koje ne čine dio hrane i nijesu namijenjene da se konzumiraju zajedno sa tom hranom;
- d) proizvodi koji sadrže pektin i dobijeni su od sušenog jabučne komine ili kore citrusa ili dunja, ili njihove mješavine, djelovanjem razblažene kiseline, nakon čega slijedi djelimična neutralizacija natrijumovim ili kalijumovim solima (tečni pektin) ;
- e) baze za žvakaće gume;
- f) bijeli ili žuti dekstrin, prženi ili dekstrinizirani skrob, skrob modifikovan kiselinskom ili alkalnom obradom, izbijeljeni skrob, fizički modifikovani skrob i skrob tretiran amilolitičkim enzimima;
- g) amonijum-hlorid;
- h) krvna plazma, jestivi želatin, proteinski hidrolizati i njihove soli, mliječni protein i gluten;
- i) aminokiseline i njihove soli, osim glutaminske kiseline, glicina, cisteina i cistina i njihovih soli koje nemaju tehnološku funkciju;
- j) kazeinati i kazein;
- k) inulin;

2) **pomoćno sredstvo** u preradi je svaka supstanca koja:

- a) se sama po sebi ne konzumira kao hrana;
- b) se namjerno koristi u preradi sirovina, hrane ili njenih sastojaka radi postizanja određene tehnološke svrhe tokom obrade ili prerade; i
- c) može dovesti do nenamjernog, ali tehnički neizbježnog prisustva ostataka te supstance ili njenih derivata u konačnom proizvodu, pod uslovom da oni ne predstavljaju zdravstveni rizik i da nemaju tehnološki efekat na konačni proizvod;

3) **funkcionalna klasa** je jedna od kategorija iz Priloga 1 posebnog propisa kojim se uređuje lista odobrenih prehrambenih aditiva, uslovi upotrebe i pravila označavanja prehrambenih aditiva, zasnovana na tehnološkoj funkciji koju prehrambeni aditiv ima u hrani;

4) **neprerađena hrana** je hrana koja nije prošla nikakav tretman koji dovodi do značajne promjene njenog prvobitnog stanja, pri čemu se značajnom promjenom ne smatra: dijeljenje, razdvajanje, sječenje, uklanjanje kostiju, mljevenje, skidanje kože, guljenje, ljuštenje, mljevenje u prah, rezanje, čišćenje, obrezivanje, duboko zamrzavanje, zamrzavanje, hlađenje, mljevenje žitarica, ljuštenje, pakovanje ili raspakivanje;

5) **hrana bez dodatih šećera** je hrana bez:

- 1) dodatih monosaharida ili disaharida;
- 2) dodate hrane koja sadrži monosaharide ili disaharide i koristi se zbog svojih zaslađivačkih svojstava;

6) **hrana sa smanjenom energetsom vrijednošću** je hrana čija je energetska vrijednost smanjena za najmanje 30% u poređenju sa originalnom hranom ili sličnim proizvodom;

7) **stoni zaslađivači** su preparati dozvoljenih zaslađivača, koji mogu sadržati i druge prehrambene aditive i/ili sastojke hrane i koji su namijenjeni prodaji krajnjem potrošaču kao zamjena za šećere;

8) **quantum satis** je oznaka da nije propisan maksimalni numerički nivo i da se supstance koriste u skladu sa dobrom proizvođačkom praksom, na nivou ne višem od onog koji je potreban za postizanje željene svrhe, odnosno ne dovodeći potrošača u zabludu.

Lista odobrenih prehrambenih aditiva, uslovi upotrebe i pravila označavanja prehrambenih aditiva

Član 6

Organ državne uprave nadležan za bezbjednost hrane utvrđuje:

1) funkcionalne klase prehrambenih aditiva u hrani i prehrambenih aditiva u prehrambenim aditivima i prehrambenim enzimima;

- 2) listu odobrenih prehrambenih aditiva za upotrebu u hrani i uslovi njihove upotrebe;
- 3) listu prehrambenih aditiva uključujući nosače odobrenih za upotrebu u prehrambenim aditivima, prehrambenim enzimima, prehrambenim aromama, prehrambenim supstancama i uslove njihove upotrebe;
- 4) listu tradicionalne hrane za koju se može ograničavati korišćenje nekih kategorija prehrambenih aditiva;
- 5) listu prehrambenih boja za koje treba navesti dodatne informacije na oznakama namirnica.

Liste odobrenih prehrambenih aditiva

Član 7

(1) Prehrambeni aditivi dati u Prilogu 2 posebnog propisa iz člana 6 stav 1 ove uredbe, mogu se stavljati na tržište i koristiti u hrani u skladu sa uslovima propisanim ovom uredbom.

(2) Prehrambeni aditivi dati u Prilogu 3 posebnog propisa iz člana 6 stav 1 ove uredbe mogu se koristiti u prehrambenim aditivima, prehrambenim enzimima i prehrambenim aromama u skladu sa uslovima propisanim ovom uredbom.

(3) Prehrambeni aditivi dati u Prilogu 2 posebnog propisa iz člana 6 stav 1 ove uredbe navode se prema kategorijama hrane u koju se mogu dodavati.

(4) Prehrambeni aditivi dati u Prilogu 3 posebnog propisa iz člana 6 stav 1 ove uredbe navode se prema prehrambenim aditivima, prehrambenim enzimima, prehrambenim aromama i hranjivim materijama ili njihovim kategorijama u koje se mogu dodavati.

(5) Prehrambeni aditivi moraju ispunjavati specifikacije iz člana 17 ove uredbe.

Zabrana stavljanja na tržište neodobrenog prehrambenog aditiva i/ili nebezbedne hrane

Član 8

Na tržište se ne smije stavljati prehrambeni aditiv niti bilo koja hrana u kojoj je takav prehrambeni aditiv prisutan, ako upotreba tog prehrambenog aditiva nije u skladu sa ovom uredbom i posebnim propisom iz člana 6 stav 1 ove uredbe.

Opšti uslovi za uključivanje i upotrebu prehrambenih aditiva u liste Evropske unije

Član 9

(1) Prehrambeni aditiv može se nalaziti u Prilozima 2 i 3 posebnog propisa iz člana 6 stav 1 ove uredbe samo ako ispunjava sljedeće uslove:

1) na osnovu dostupnih naučnih dokaza ne predstavlja bezbjednosni rizik za zdravlje potrošača pri predloženom nivou upotrebe;

2) postoji opravdana tehnološka potreba koja se ne može ostvariti drugim ekonomski i tehnološki izvodljivim sredstvima; i

3) njegova upotreba ne dovodi potrošača u zabludu;

4) ispunjava druge legitimne faktore, uključujući faktore zaštite životne sredine.

(2) Prehrambeni aditiv koji je dat u Prilozima 2 i 3 posebnog propisa iz člana 6 stav 1 ove uredbe mora, pored prednosti i koristi za potrošača, služiti jednoj ili više od sljedećih svrha:

1) očuvanje prehrambenog kvaliteta hrane;

2) obezbjeđivanje potrebnih sastojaka ili komponenti za hranu proizvedenu za grupe potrošača sa posebnim prehrambenim potrebama;

3) poboljšanje roka trajanja ili stabilnosti hrane ili poboljšanje njenih organoleptičkih svojstava, pod uslovom da se priroda, supstanca ili kvalitet hrane ne mijenjaju na način koji dovodi potrošača u zabludu;

4) olakšavanje proizvodnje, prerade, pripreme, obrade, pakovanja, transporta ili skladištenja hrane, uključujući prehrambene aditive, prehrambene enzime i prehrambene arome, pod uslovom da se aditiv ne koristi za prikrivanje posljedica korišćenja nekvalitetnih sirovina ili bilo kakvih nepoželjnih praksi ili tehnika, uključujući nehigijenske prakse ili tehnike, tokom takvih aktivnosti.

(3) Izuzetno od stava 2 tačka 1 ovog člana, prehrambeni aditiv koji može smanjiti nutritivni kvalitet hrane, a dat je u Prilogu 2 posebnog propisa iz člana 6 stav 1 ove uredbe, može se koristiti ako je ispunjen jedan od sljedećih uslova:

1) hrana ne predstavlja značajan dio uobičajene ishrane; ili

2) prehrambeni aditiv je neophodan za proizvodnju hrane za grupe potrošača sa posebnim prehrambenim potrebama.

Posebni uslovi za zaslađivače

Član 10

Prehrambeni aditiv može se nalaziti u Prilogu 2 posebnog propisa iz člana 6 stav 1 ove uredbe za funkcionalnu klasu zaslađivača ako, pored ispunjavanja jedne ili više svrha iz člana 9 stav 2 ove uredbe, ispunjava jedan ili više od sledećih ciljeva:

- 1) zamjena šećera u proizvodnji hrane sa smanjenom energetsom vrijednošću, nekariogene hrane ili hrane bez dodatih šećera; ili
- 2) zamjena šećera kada to omogućava produženje roka trajanja hrane; ili
- 3) proizvodnja hrane namijenjena posebnim prehrambenim upotrebama kako je definisano posebnim propisom o supstancama koje se mogu dodavati hrani za posebne prehrambene potrebe.

Posebni uslovi za boje

Član 11

Prehrambeni aditiv može se nalaziti u Prilogu 2 posebnog propisa iz člana 6 stav 1 ove uredbe za funkcionalnu klasu boje ako, pored ispunjavanja jedne ili više svrha navedenih u članu 9 stav 2 ove uredbe, ispunjava jedan ili više od sledećih ciljeva:

- 1) obnavljanje izvornog izgleda hrane čija je boja promijenjena usljed obrade, skladištenja, pakovanja i distribucije, pri čemu može biti narušena vizuelna prihvatljivost;
- 2) činjenje hrane vizuelno privlačnijom;
- 3) davanje boje hrani koja je inače bezbojna.

Funkcionalne klase prehrambenih aditiva

Član 12

(1) Prehrambeni aditivi mogu se nalaziti u Prilozima 2 i 3 i u jednoj od funkcionalnih klasa iz Priloga 1 posebnog propisa iz člana 6 stav 1 ove uredbe, na osnovu njihove glavne tehnološke funkcije.

(2) Raspoređivanje prehrambenog aditiva u određenu funkcionalnu klasu ne isključuje njegovu upotrebu za više funkcija.

Sadržaj lista Zajednice prehrambenih aditiva

Član 13

(1) Prehrambeni aditiv koji ispunjava uslove iz čl. 9, 10 i 11 ove uredbe može biti uključen u Prilozima 2 i 3 posebnog propisa iz člana 6 stav 1 ove uredbe.

(2) Unos prehrambenog aditiva u Priloge 2 i 3 posebnog propisa iz člana 6 stav 1 ove uredbe mora da sadrži:

- 1) naziv prehrambenog aditiva i njegov E broj;
- 2) hranu kojoj se prehrambeni aditiv može dodavati;
- 3) uslove pod kojima se prehrambeni aditiv može koristiti;
- 4) postoje ograničenja u pogledu prodaje prehrambenog aditiva neposredno krajnjem potrošaču, po potrebi.

Nivoi upotrebe prehrambenih aditiva

Član 14

(1) Prilikom utvrđivanja uslova upotrebe iz člana 13 stav 2 tačka 3 ove uredbe:

- 1) nivo upotrebe mora biti utvrđen na najnižem nivou potrebnom za postizanje željenog efekta;
- 2) nivoi se moraju zasnivati na:
 - a) prihvatljivom dnevnom unosu ili ekvivalentnoj procjeni utvrđenoj za prehrambeni aditiv, kao i na vjerovatnom dnevnom unosu iz svih izvora;
 - b) kada se prehrambeni aditiv koristi u hrani namijenjenoj posebnim grupama potrošača, mogućem dnevnom unosu aditiva od strane potrošača iz tih grupa;

(2) Za prehrambeni aditiv ne utvrđuje se maksimalni numerički nivo (quantum satis) i u tom slučaju, prehrambeni aditiv se koristi u skladu sa principom quantum satis, po potrebi.

(3) Maksimalni nivoi prehrambenih aditiva dati u Prilogu 2 posebnog propisa iz člana 6 stav 1 ove uredbe primjenjuju se na hranu u obliku u kojem se stavlja na tržište, osim ako nije drugačije navedeno.

(4) Izuzetno od stava 3 ovog člana, za sušenu i/ili koncentrisanu hranu koja se mora rekonstituisati, maksimalni nivoi se primjenjuju na hranu nakon rekonstitucije u skladu sa uputstvima na etiketi, uzimajući u obzir minimalni faktor razrjeđenja.

(5) Maksimalni nivoi za boje utvrđeni u Prilogu 2 posebnog propisa iz člana 6 stav 1 ove uredbe primjenjuju se na količine obojenog principa sadržanog u preparatu za bojenje, osim ako nije drugačije navedeno.

Promjene u procesu proizvodnje ili početnim materijalima prehrambene aditive

Član 15

Kada je prehrambeni aditiv dat u Prilozima 2 i 3 posebnog propisa iz člana 6 stav 1 ove uredbe, a dođe do značajne

promjene u njegovim metodama proizvodnje ili u korišćenim ulaznim materijalima, ili do promjene veličine čestica (putem nanotehnologije), prehrambeni aditiv proizveden tim novim metodama ili materijalima je različit aditiv i za njegovo stavljanje na tržište neophodan je novi unos u liste Priloga 2 i 3 posebnog propisa iz člana 6 stav 1 ove uredbe ili izmjena specifikacija.

Prehrambeni aditivi koji spadaju u područje primjene propisa o genetički modificiranoj hrani i hrani za životinje

Član 16

Prehrambeni aditivi koji su obuhvaćeni propisom kojim se uređuje genetički modificirana hrana i hrana za životinje, mogu biti uključeni u liste koje čine sastavni dio Priloga 2 i 3 posebnog propisa iz člana 6 stav 1 ove uredbe.

Specifikacije prehrambenih aditiva

Član 17

(1) Specifikacije prehrambenih aditiva koje se odnose na porijeklo, kriterijume čistoće i druge potrebne informacije donose se prilikom uključivanja prehrambenog aditiva u listu odobrenih aditiva koja čini sastavni dio Priloga 2 i 3 posebnog propisa iz člana 6 stav 1 ove uredbe.

(2) Posebne zahtjeve o utvrđivanju specifikacija za prehrambene aditive propisuje organ državne uprave nadležan za bezbjednost hrane.

Upotreba prehrambenih aditiva u neprerađenoj hrani

Član 18

Prehrambeni aditivi ne smiju se koristiti u neprerađenoj hrani, osim kada je takva upotreba utvrđena posebnim propisom iz člana 6 stav 1 ove uredbe.

Upotreba prehrambenih aditiva u hrani za odojčad i malu djecu

Član 19

Prehrambeni aditivi ne smiju se koristiti u hrani za odojčad i malu djecu, kao ni u hrani za posebne medicinske potrebe i zamjeni za cjelodnevnu ishranu pri redukcijskoj dijeti, uključujući dijetetsku hranu za odojčad i malu djecu za posebne medicinske namjene, utvrđene posebnim propisom o hrani za odojčad i malu djecu, hrani za posebne medicinske potrebe i zamjeni za cjelodnevnu ishranu pri redukcijskoj dijeti, osim kada je takva upotreba predviđena posebnim propisom o genetički modificiranoj hrani i hrani za životinje.

Upotreba boja za označavanje

Član 20

Za označavanje zdravstvene ispravnosti u skladu sa posebnim propisima o pitanjima zdravstvene ispravnosti koja utiču na trgovinu svježim mesom u Evropskoj uniji, kao i za druge neophodne oznake na mesnim proizvodima, za dekorativno bojenje ljuski jaja i za žigovanje ljuski jaja, mogu se koristiti samo prehrambene boje date u Prilogu 2 posebnog propisa iz člana 6 stav 1 ove uredbe, u skladu sa posebnim propisom o higijeni za hranu životinjskog porijekla.

Princip prenošenja (carry-over princip)

Član 21

(1) Prisustvo prehrambenog aditiva je dozvoljeno:

1) u smjesi hrane koja nije obuhvaćena Prilogom 2 posebnog propisa iz člana 6 stav 1 ove uredbe, ako je prehrambeni aditiv dozvoljen u jednom od sastojaka te složene hrane;

2) u hrani kojoj je dodat prehrambeni aditiv, prehrambeni enzim ili prehrambena aroma, ako:

a) je prehrambeni aditiv dozvoljen u prehrambenom aditivu, prehrambenom enzimu ili prehrambenoj aromi u skladu sa ovom uredbom i posebnim propisom kojim se propisuje lista odobrenih prehrambenih aditiva, uslovi upotrebe i pravila označavanja prehrambenih aditiva; i

b) je prenesen u hranu putem tog prehrambenog aditiva, prehrambenog enzima ili prehrambene arome; i

3) nema tehnološku funkciju u gotovoj hrani;

4) u hrani koja se koristi isključivo za pripremu smjese hrane, pod uslovom da smjesa hrane ispunjava zahtjeve ove uredbe i posebnog propisa kojim se propisuje lista odobrenih prehrambenih aditiva, uslovi upotrebe i pravila označavanja prehrambenih aditiva.

(2) Stav 1 ovog člana ne primjenjuje se na hranu za odojčad, prelazne formule, prerađenu hranu na bazi žitarica i dječju

hranu, kao i dijetetsku hranu za posebne medicinske potrebe namijenjenu odojčadima i maloj djeci iz posebnog propisa o hrani za odojčad i malu djecu, hrani za posebne medicinske potrebe i zamjeni za cjelodnevnu ishranu pri redukcionalnoj dijeti, osim ako je to izričito predviđeno.

(3) Ako se prehrambeni aditiv u prehrambenoj aromi, prehrambenom aditivu ili prehrambenom enzimu dodaje hrani ili ima tehnološku funkciju u hrani, smatra se prehrambenim aditivom te hrane, a ne prehrambenim aditivom dodate arome, prehrambenog aditiva ili prehrambenog enzima i mora ispunjavati uslove upotrebe za tu hranu.

(4) Ne isključujući primjenu stava 1 ovog člana, prisustvo prehrambenog aditiva koji se koristi kao zaslađivač dozvoljeno je u smjesi hrane bez dodatih šećera, u hrani sa smanjenom energetsom vrijednošću, u dijetetskoj hrani namijenjenoj niskokaloričnim dijetama, u nekariogenoj smjesi hrane i u smjesi hrane sa produženim rokom trajanja, pod uslovom da je zaslađivač dozvoljen u jednom od sastojaka te smjese hrane.

Tradicionalna hrana

Član 22

Korišćenje nekih kategorija prehrambenih aditiva u tradicionalnoj hrani može se ograničavati u skladu sa Prilogom 4 posebnog propisa iz člana 6 stav 1 ove uredbe.

Označavanje prehrambenih aditiva koji nijesu namijenjeni prodaji krajnjem potrošaču

Član 23

Prehrambeni aditivi koji nijesu namijenjeni prodaji krajnjem potrošaču, ako se prodaju pojedinačno ili pomiješani međusobno i/ili sa sastojcima hrane, u skladu sa posebnim propisom o informisanju potrošača o hrani, mogu se stavljati na tržište samo uz označavanje iz člana 22 ove uredbe, koje mora biti lako uočljivo, jasno čitljivo i neizbrisivo, pri čemu informacije moraju biti na jeziku koji je lako razumljiv kupcima.

Opšti zahtjevi za označavanje prehrambenih aditiva koji nijesu namijenjeni prodaji krajnjem potrošaču

Član 24

(1) Kada se prehrambeni aditivi koji nijesu namijenjeni prodaji krajnjem potrošaču prodaju pojedinačno ili pomiješani međusobno i/ili sa drugim sastojcima hrane i/ili drugim supstancama koje su im dodate, njihovo pakovanje ili posude moraju sadržati sljedeće informacije:

1) naziv i/ili E-broj utvrđen posebnim propisom kojim se propisuje lista odobrenih prehrambenih aditiva, uslovi upotrebe i pravila označavanja prehrambenih aditiva za svaki prehrambeni aditiv ili trgovački opis koji uključuje naziv i/ili E-broj svakog prehrambenog aditiva;

2) oznaku "za hranu" ili oznaku "ograničena upotreba u hrani" ili precizniju oznaku koja upućuje na njegovu namjenu u hrani;

3) po potrebi, posebne uslove skladištenja i/ili upotrebe;

4) oznaku koja identifikuje šaržu ili lot;

5) uputstva za upotrebu, ako bi njihovo izostavljanje onemogućilo pravilnu upotrebu prehrambenog aditiva;

6) naziv ili poslovni naziv i adresu proizvođača, odgovornog lica za pakovanje ili prodavca;

7) podatak o maksimalnoj količini svake komponente ili grupe komponenti koje podliježu kvantitativnom ograničenju u hrani i/ili odgovarajuće informacije u jasnim i lako razumljivim izrazima, a kada se ista granica količine primjenjuje na grupu komponenti koje se koriste pojedinačno ili u kombinaciji, može se navesti ukupni procenat kao jedna vrijednost (granica količine izražava se numerički ili po principu quantum satis);

8) neto količina;

9) datum minimalne trajnosti ili rok upotrebe;

10) kada je relevantno, informacije o prehrambenom aditivu ili drugim supstancama iz ovog člana koje su navedene u posebnom propisu o informisanju potrošača u pogledu označavanja sastojaka prisutnih u hrani.

(2) Ako se prehrambeni aditivi prodaju pomiješani međusobno i/ili sa drugim sastojcima hrane, njihovo pakovanje ili posude moraju sadržati listu svih sastojaka u opadajućem redoslijedu prema procentu njihovog masenog udijela u ukupnoj cjelini.

(3) Ako se supstance (uključujući prehrambene aditive ili druge sastojke hrane) dodaju prehrambenim aditivima radi olakšavanja njihovog skladištenja, prodaje, standardizacije, razrjeđivanja ili rastvaranja, njihovo pakovanje ili posude moraju sadržati listu svih tih supstanci u opadajućem redoslijedu prema procentu njihovog masenog udijela u ukupnoj cjelini.

(4) Izuzetno od st. 1, 2 i 3 ovog člana, informacije iz stava 1 tač. 5, 6 i 7 i st. 2 i 3 ovog člana, mogu se nalaziti samo na dokumentaciji koja prati isporuku, a koja se dostavlja uz ili prije isporuke, pod uslovom da je oznaka "nije za maloprodaju" jasno vidljiva na pakovanju ili posudi tog proizvoda.

(5) Izuzetno od st. 1, 2 i 3 ovog člana, kada se prehrambeni aditivi isporučuju u cisternama, sve informacije mogu biti navedene samo na dokumentaciji koja se odnosi na pošiljku, a koja se dostavlja uz isporuku.

Označavanje prehrambenih aditiva namijenjenih prodaji krajnjem potrošaču

Član 25

(1) Ne isključujući primjenu posebnih propisa o informisanju potrošača, o oznakama ili znakovima koji identifikuju seriju kojoj pripada određena hrana i posebne propise o genetski modificovanoj hrani i hrani za životinje, prehrambeni aditivi koji se prodaju pojedinačno ili pomiješani međusobno i/ili sa drugim sastojcima hrane, a namijenjeni su prodaji krajnjem potrošaču, mogu se stavljati na tržište samo ako njihovo pakovanje sadrži sljedeće informacije:

1) naziv i E-broj utvrđen posebnim propisom kojim se propisuje lista odobrenih prehrambenih aditiva, uslovi upotrebe i pravila označavanja prehrambenih aditiva za svaki prehrambeni aditiv ili trgovački opis koji uključuje naziv i E-broj svakog prehrambenog aditiva;

2) oznaku "za hranu" ili oznaku "ograničena upotreba u hrani" ili precizniju oznaku koja upućuje na njegovu namjenu u hrani.

(2) Izuzetno od stava 1 tačka 1 ovog člana, trgovački opis stonog zaslađivača mora uključivati izraz "stoni zaslađivač na bazi ...", uz navođenje naziva zaslađivača koji se koriste u njegovom sastavu.

(3) Označavanje stonog zaslađivača koji sadrži poliole i/ili aspartam i/ili so aspartam-acesulfam mora sadržati sljedeća upozorenja:

1) poliole: "prekomjerna konzumacija može izazvati laksativne efekte";

2) aspartam / so aspartam-acesulfam: "sadrži izvor fenilalanina".

(4) Proizvođači stonih zaslađivača dužni su da na odgovarajući način učine dostupnim potrebne informacije kako bi omogućili njihovu bezbjednu upotrebu od strane krajnjeg potrošača.

(5) Za informacije iz st. 1 do 3 ovog člana, primjenjuju se i odredbe posebnog propisa o informisanju potrošača o hrani.

Zahtjev za označavanje hrane koja sadrži određene prehrambene boje

Član 26

(1) Pored zahtjeva utvrđenih posebnim propisom o informisanju potrošača o hrani, označavanje hrane koja sadrži prehrambene boje utvrđene u Prilogu 4 posebnog propisa kojim se propisuje lista odobrenih prehrambenih aditiva, uslovi upotrebe i pravila označavanja prehrambenih aditiva, mora uključivati dodatne informacije utvrđene u tom propisu.

(2) U pogledu informacija iz stava 1 ovog člana, shodno se primjenjuju odredbe iz posebnog propisa o informisanju potrošača o hrani.

Obaveza obavještanja

Član 27

(1) Subjekat u poslovanju hranom koji proizvodi ili stavlja na tržište prehrambene aditive, dužan je da na zahtjev organa uprave nadležnog za bezbjednost hrane, hrane za životinje i predmeta i materijala koji su namijenjeni da dolaze u kontakt sa hranom (u daljem tekstu: nadležni organ) dostavi podatke o svim novim naučnim ili tehničkim informacijama koje bi mogle uticati na procjenu bezbjednosti prehrambenog aditiva.

(2) Subjekat u poslovanju hranom koji proizvodi ili stavlja na tržište prehrambene aditive dužan je da na zahtjev nadležnog organa dostavi informacije o stvarnoj upotrebi prehrambenog aditiva.

Prestanak važenja

Član 28

Danom stupanja na snagu ove uredbe prestaje da važi Uredba o aditivima koji se mogu koristiti u hrani ("Službeni list CG", br. 19/16, 80/16, 39/18, 62/19 i 133/22).

Stupanje na snagu

Član 29

Ova uredba stupa na snagu osmog dana od dana objavljivanja u "Službenom listu Crne Gore".

Broj: 11-011/26-2785

Podgorica, 9. jula 2026. godine

Vlada Crne Gore

Predsjednik,
mr **Milojko Spajić**, s.r.